

Lawz Ndaej Vut Bae Sawcuengh

□ Suh Dazcin / 苏达进

Daengz laux hag Sawcuengh,
Gwn haeuxdonq hix van,
Ngoenz ndaejhoengq youq ranz,
Lumj iek dam gwn haeux.

Aeu Sawcuengh raiz fwen,
Geij ndwen daeuz baez gauj,
Youh ndaej ngaenz demhaeuj,
Ndawsim raeuj dangqmaz.

Ngaenzgauj mbouj yawj naek,
Sawcuengh raek mbouj baenz,
Vwnzva minzczu hwng,
Sawcuengh caen youqgaenj.

Raeuz dwg vunz Bouxcuengh,
Saedceij onj huzndei,
Vahcuengh geij cien bei(bi),
Lawz vut bae mbouj yungh?

Hag caeuq lienh doxgap,
Yiengj vaiqlag haujlai,
Ciengzciengz lumz gwn ngaiz,
Caen dwg maez bae liux.

Sawcuengh dwg vahmeh,
Deq raeuz bae swncienz,
Gij fwen seiq loeg liemz,
Cienz ndaej bae gyae'gyangq.

Raeuz dwg vunz Guengjsae,
Ciengzseiz gangj Vahcuengh,
Sawcuengh aeu hwngvuengh,
Mboujduenh bae ciepcienz.

Sawcuengh caen dwg ndei,
Seizseiz bae cienz gvangq,
Vunzlai cungj sim'angq,
Haisim danq dangqmaz.

Aeu Sawcuengh raiz fwen,
Aensim vuen raixcaix,
Sawcuh ndei dahraix,
Sawcuengh daihdaih cienz.

Aeu Sawcuengh raiz fwen,
Fwen raeuz cienz cien leix,
Vunz diegseng haengjheiq,
Son vunz eiq mbanjranz.

Gou maij Sawcuengh lai,
Mbouj gwn ngaiz hix nyienh,
Gangj Vahcuengh mbouj bienq,
Ngoenzngoenz yiengj angqfaengz.

Rox gangj youh rox raiz,
Dawz dungxaiz okdaeuj,
Laux uk mbouj bienq naeuh,
Aensim raeujrubrub.

Ngeix haeuj fwen Sawcuengh,
Cuengq haeuxdonq hix miz,
Lumj haeuxcid guhciz(ceiz),
Mbouj doxliz nem dwk.

Sawcuengh dwg vahmeh,
Gaej sajdeq vunz caez,
Rox gangj caengz suenq ndei,
Rox raiz bae cij ngamj.

Nyez hag Sawcuengh lai,
Hix bienq gvai mbouj noix,
Lumj ndaej gwn dangzoiq,
Mbouj nyienh doiq dauqlaeng.

Sawcuengh youq ndawsim,
Gij caencingz raiz ok,
Mbouj lumz gij gaengok,
Bae gyawz doek mbouj ndaej.

Angq Riu Byaij Baenaj

□ Vangz Funghewz / 黄锋克

Raqraq rumzcin homvan haenx ci gwnzbiengz heuswdsd, hix ci sim mwngz sim gou raeujrubrub, dangqnaq gizgiz ronghsagsag.....

Go' nyaj iq heusausau, youq lajdin banhrailh, mbaw nyaj heuoiq bibuengq youq ndaw rumz biufefe, naednaed raemxraiz sij mbouj ndaej doek. Go' nyaj iq riu le, ciepcoux ndit gyanghaet rongh ndei; godauz henzndang laeglemx haiva, longxriu gyaeundeide dangqmaz, ciuyinx duzmbaj laisaek ndonjgvaq fwjmok hau. Diuz rij fubfed lae gvaq lajmbanj, "dingding dungdung" ciengqgo, raemxrij riu le, buet coh doenghnaz gvangqlangh.

Ngoenzneix, mwngz byaij gwnz roen, dwg mbouj dwg najriu hwnjdin?

Haetromh hwnqdaeuj, ndwn youq dangqnaq aengingq, caemrwgrwg doiq bonjfaenh riu mbat ndeu, vut loqdwglau haemhlwenz gvaq raeblaeng, ngoenz moq haidaeuz le. Byaij gwnz roen, bungq daengz vunz najmoq, hix doiq de riu mbat ndeu, camndei de mbat ndeu; caeuq baengzyoux caemhyouq, aeu najriu unqswnh, rag loqsiengj song mbiengj daeuj gyawj..... Daengngoenz doekcong, yungh najriu cinghseuj

caensim mwngz soengq moix benq fwjgyaepbya bae, yunghsim soengq moix aen doengxaemh bae.

Najriu, lumjbaenz aen daengngoenz ngamq hwnj rim senggei, hawj moix aen sengmingh cingq majsang raeujrub.

Najriu, lumjbaenz benq nditfwj gyaeundeide, ciuqrongh moix aen rizdin dauqma ranz.

Najriu, aeu ok caensim, mbouj gouz bauqdap saek di; aeu sim' aek lauxsaed, mbouj aeu daegdaengq guhyiengh; aeuyungh dwg simgyaez, aeuyungh dwg okrengz.....

Banhaemh daeuj daengz, ndwenngoenz lauhei q miz mbanj laepngau haemzhoj, cijaeu miz simgyaez, caensaed najdoi q, najriu couhdwg aen daengdap mbouj ndaep ndeu, de aeu gij yienghceij feizlueg ruemx dawz rogdoengh, ciuqrongh diuz loh baihnaj mwngz. Doekfwn le, simcingz mwngz lauhei q dwg sieng' in yienghneix yienghhaenx, hoeng cijaeu gag saenq bonjfaenh, najriu couhdwg aen liengj hung gang hwnj gwnzmbwn mwngz, hawj mwngz byaijgvaq moix aen ndwenngoenz rumz geuj fwn doek.

Riunyaen, dwg fag giemqsongbak



▲ Seizdoeng Mungzsanh Cangzbingz Yauzczu Yangh lij ndit raeuj lumj seizcin faex heu gyaeundeide dangqmaz.

Gyangh Yungjlu ingj

ndeu, ndaej gvejgat diuz cingzngaih caen neix; riugae, dwg gaenj cim doeg ndeu, ndaej coeg byoengq loqsiengj mwngz caeuq gou. Mbangjbaez baknaek hix dwg boengz raemxgyaeng ndeu, gvaq saedceij lumj mbaw fanruz nei hai mbouj hwnj.

Mwh mwngz guh baenz gwn, gaej daekeiq fwngfwng, angqriu youq ndawsim couh ndei, dawz yienghsiengq ceiq gyaeundeide najdoi q rumziq, soengq hawj gyoengqvunz

henzndang mwngz; mwh mwngz guh saetbailh, gaej doeknaiq, hix aeu najriu, yungh raemxda swiq caenh gij dungxliengz, youq gizlawz laemx couh youq gizlawz bin hwnj.

Ngoenzneix, mwngz angq riu lwi? Doiq baengzyoux hawj mbat riu cingh ndeu, doiq bohme hawj mbat riu caen' eiq ndeu, doiq lwgnyez hawj mbat riu sienh' eiq ndeu, mwngz couhdwg boux vunz gwnzbiengz ceiq vaiqlag ceiq vuenyungz ndeu.